



**PORTAVÓS**  
VI GOVERN U  
KONSTITUSIONÁL



**KOMUNIKADU  
BA MEDIA**

Díli, Loron 19 fulan-maiu tinan 2016

## **Projetu TL Cement avansa ho asinatura Akordu Espesiál Investimentu nian**

Projetu TL Cement hela tan hakat ida atu realiza, bainhira Governu Timor-Leste asina Akordu Espesiál Investimentu nian ida ho empreza ne'e, iha tersa kalan loron 17 fulan-maiu.

Iha serimónia asinatura nian, ne'ebé realiza iha Otél Ramelau, iha Dili, Ministru Estadu Koordinadór Asuntu Ekonómiku nian, Estanislau da Silva, esplika katak Governu kolabora ho projetu ne'e liuhusi asinatura Akordu Investimentu Espesiál ida no asinatura "karta intensaun sira ne'ebé la vinkula" nian ida, atu marka katak, iha futuru, Governu bele partisipa iha projetu ne'e.

Ministru Estadu ne'e dehan katak medida hirak ne'e hato'o mensajen katak "Governu hakarak haree fábrica simentu nian ida ne'e hamriik no bele karik lais liután!"

Diretór TL Cement nian, James Rhee, hato'o ninia haksolok ho akordu no ho projetu Baukau nian ne'e, ne'ebé sei lori benefisiu substansiál sira ba Timor-Leste, inklui oportunidade formasaun, impostu, no "royalties" no estimativa ida kona-ba empregu hamutuk 650 ba tempu tomak nian.

Fábrica simentu ne'e sei harii besik zona luan ida ne'ebé nakonu ho ahu-ruin (kalkáriu) ho qualidade aas iha rejiaun Baukau nian, no sei halo produsaun ba simentu iha faze báziku fábrica nian (clínquer) ba esportasaun no simentu ba abastesimentu konstrusaun sivil iha Timor-Leste. Komunitade lokál maka sei sai benefisiáriu dahuluk husi projetu ne'e, liuhusi konstrusaun unidade formasaun nian ida. Benefisiu sira ba tempu naruk sei apresenta bainhira Governu hahú ona serbisu ho empreza ne'e no hodi garante kontratasaun traballadór sira iha munisípiu hotu-hotu Timor-Leste nian.

Projetu TL Cement ne'e abranje objetivu boot tolu Governu nian kona-ba reforma ekonómika sira: aumenta investimentu privadu, promove diversifikasaun ekonómika no promove empregu sustentavel. Iha serimónia ne'e, asina ona mós sertifikadu investimentu nian ho L & S Unipessoal (otelaria), ho Palm Spring Hotel Lda. no ho Stamford Medical Lda.

Portavós Governu Konstitusionál VI nian, Ministru Estadu Agio Pereira, hatudu nia laran-haksolok ba avansu husi projetu TL Cement nian no hateten katak "susesu projetu ne'e nian sei fó sinál pozitivu ba investidór estranjeiru sira seluk, hodi aumenta konfiansa katak Timor-Leste sai hanesan fatin ne'ebé dí'ak hodi halo negósiu". **REMATA**



**Agio Pereira**

+670 7723 0011

[agio.pereira@cdm.gov.tl](mailto:agio.pereira@cdm.gov.tl)

[govtlmedia@gmail.com](mailto:govtlmedia@gmail.com)

[www.timor-leste.gov.tl](http://www.timor-leste.gov.tl)